

重刊江甯府志卷之五十一

人物十

仙釋

漢茅盈元帝時隱句曲山學道遇至人授以仙術盈弟衷爲西河太守固爲執金吾各棄官渡江求兄於東山咸得仙去世稱三茅君

吳康僧會西域康居國人赤烏四年至建康時中國未有像教會始誅茅設像卽秦淮西南建初塔寺藏所謂舍利者江左之有僧刹自會始

葛元字孝先句容人吳時學道得仙號曰葛仙翁以其煉丹祕術授弟子鄭隱

晉許邁字叔元丹楊句容人也少恬靜不慕仕進謂餘杭懸霤山近延陵之茅山是洞庭西門潛通五嶽陳安世茅季偉常所游處

學
大
茅

於是立精舍於懸雷攜同志徧游名山因改名元字遠遊著書十二篇論神仙之事後莫知所終好道者皆謂之羽化矣晉書有傳葛洪字稚川句容人元從孫究覽書籍尤好神仙導養之法從鄭隱學煉丹後師事鮑元元以女妻洪尋止羅浮山著述不輟自號抱朴子因以名書剋期而逝舉屍入棺輕如空衣晉書有傳李盤白溧陽人築室高臺山之西煉丹脩道畜一虎飼以藥苗謂之仁虎

帛尸黎密西域人永嘉中至東土常行頭陀行卒於梅岡元帝於冢邊立寺號高座道人世說新語注引高座傳

支遁字道林林慮人或云陳留人居會稽哀帝遣迎至建康與一代名流皆著塵外之狎後終於洛陽在白馬寺與馮懷論逍遙篇見世說

竺法汰止瓦官寺講放光般若經僑文帝親臨聽講公卿畢至竺道壹亦止瓦官寺受學竺法汰思澈淵深晦迹隱智琅邪王珣深加禮敬

宋杯度嘗乘木杯渡水因爲號在建康時唯荷一蘆圖子擲於地數十人舉之不能得

求那跋摩中印度人元嘉中居金陵祇園寺文帝嘗問曰朕常願持齋不殺生命對曰帝王所脩與凡庶不同出一嘉言則士庶咸悅布一善政則神人以和刑不夭命役不勞力則風雨時若百穀滋繁以此持齋齋亦大矣以此不殺利亦多矣安在輟半日之餐全一禽之命然後爲宏濟耶帝撫几稱善

慧琳秦郡人姓劉氏有才華兼內外之學爲廬陵王義真所知嘗著均善論頗貶裁佛法文帝見而賞之

慧嚴慧議竝住東安寺學行精整爲道俗所推時鬪場寺多禪僧都下爲之語曰鬪場禪師窟東安談易林

僧導十歲出家師以觀世音經授之讀竟卽相諮議師大悅授以法華高祖西伐長安要與相見孝武卽位勅於瓦官寺開講維摩摩訶衍苦節有精理大明中於都下出新經勝鬘經尤見重釋學覺意恆於瓦官寺樹下坐禪善神呪以香塗掌能見人往事

智嚴初住始興寺性本靜虛志避喧囂元嘉中共沙門寶雲譯寫西域所得梵本眾經於枳園寺肅思話婦疾病恆見鬼物迎嚴說法疾遂瘳

曇遷游心佛義善談莊老工正書止烏衣寺范蔚宗被誅門有十二喪無敢近者遷抽貨衣物悉營葬送孝武聞而歎賞謂徐爰曰卿著宋書勿遺此人

竺道生初入廬山幽棲七年來止青園寺顏延之等竝挹敬風猷著法身無色諸論籠罩舊說妙有淵旨

楊羲和幼而通靈與二許結神明之交博學工書爲公府令與甯乙丑眾眞降所居後乘雲駕鶴仙去云

李明避世不仕隱居句曲鬱岡山丹成升元洲今舊迹存焉齊釋慧約姓婁年二十達妙理周彥倫素所欽服迺於鍾山舊館造草堂寺以居之

智稱永明初止建康之安樂寺嘗謂安土治人莫先乎禮閑邪遷善莫尚乎律撰義記八篇

梁釋寶誌太始中出鍾山往來都邑被髮徒跣語默不倫豫言未兆遠近驚赴梁武帝尤深敬事呼爲誌公好爲識記所謂誌公符是也

菩提達摩南天竺人普通七年自西域達南海廣州武帝遣使迎赴京師車駕爲之出郊延居別殿問曰朕卽位以來寫經度僧不可勝紀有何功德答曰此但人天小果有漏之因如影隨形雖有非實帝不領悟達摩知機不契折蘆渡江

陶宏景字通明丹陽秣陵人也年十歲得葛洪神仙傳晝夜研尋便有養生之志謂人曰仰青雲覩白日不覺爲遠矣嘗言句曲山下是第八洞宮名金壇華陽之天乃中山立館自號華陽隱居永元初更築三層樓處其上有時獨游泉石望見者以爲仙人梁書有傳

雲光法雲寺僧也凡講經天雨花如雪片

傅宏東陽烏傷人體權應道臨嗣維摩金色表笏異香流掌武帝延主鍾山定林寺甘露恆流常建大龕一柱八面實以諸經運行

不礙謂之輪藏

法悅天監中率合同緣於小莊嚴寺鑄造丈八無量佛像開模量度乃踊成丈九而光相不差勅移像光宅寺

曇瑗住光宅寺棲託不競每上鍾阜游詠累日年八十二示寂勅立白塔建碑於寺

智寂住同泰寺簡文帝有志銘

陳桓闔者不知何許人執役陶宏景十年不懈一旦有白鶴集庭宏景臨軒撫接忽有青衣童子曰太上命求桓君耳遂乘鶴冲舉王知遠琅邪人父曇選陳揚州刺史母夢靈鳳集身因有娠知遠警敏通書傳事陶宏景傳其術爲道士嘗識唐太宗於微時卽茅山爲觀居之一日謂弟子曰吾今署少室山伯將行卽沐浴衣冠若寢而卒唐書有傳

智顗華容人謁慧思禪師悟法華三昧宣帝大建七年抵建康詔居光宅寺

道宗住瓦官寺耳不妄屬口無誑言麻學經論了無常師終日寢處卷軸閒

唐法融隱茅山後入幽棲寺石室脩道虎鹿馴伏百鳥獻花貞觀中四祖訪之付以燦大師頓教法門自後法席之盛擬於黃梅其寺與山遂號祖堂云

智巖大業中以郎將累立戰功貞觀十七年歸建業入牛頭山謁融禪師授以真訣爲第二世祖

慧方先投開善寺出家後入牛頭山謁智巖諮詢祕要豁然領悟遂得正法不復出林藪

法持年二十游黃梅聞法復謁慧方爲之印可爲牛頭第四世祖

智威江甯陳氏子謁法持禪師傳授正法爲牛頭第五世祖

慧忠得法於智威平生一衲一鎗嘗有穀二廩盜窺之虎爲之守縣令張遜入山謁問有何徒曰三五人遜曰可見乎忠擊牀者三有三虎哮而出其神異多類此此爲牛頭第六世祖

守亮居瓦官寺善周易李衛公鎮江南下令求論易者亮至升座講解詞旨朗暢公所心疑而欲難者亮輒先意離決遂命以寺爲居置講座於府將校以下皆入聽講

元素字道清止江甯長壽寺嘗言道惟心證不在言通智威禪師以東南正法期之

中孚居高座寺李白族子白有登梅岡贈中孚詩寺有然理庵中孚并其遺蹟也

曇珙大厓中歸棲霞探曹溪牛頭之旨沈研覃思朗然內得乃曰

大丈夫了心當如此貞元時坐寂於瓦官寺

伍達靈肅宗時謁者得道於句容之崙山山下有伍達靈潭

貫休字德隱俗姓姜氏素有禪行貞元十七年至溧水建龍城寺

居焉喜吟詠詩在靈一無可清江之上著禪月集三十卷

張果六合園叟也後攜妻至王屋天壇山仙去

神建受法於四祖有逢後即止之語遂立道場於靈巖山檀眾雲集

神堅住禪證寺咸通中黃巢兵至以刃刺之堅不動其膜拜而去
吳法通潤州丹陽人有文學試舉子業不利入茅山爲道士乾符
二年僖宗遣使受大洞籙尊爲度師賜號希微先生天祐四年潛
入巖洞不知蹤迹見十國春秋

五代劉得常昇州人十七歲作大道歌詣茅山見國師吳法通法

通曰賢者能飲茅山泉一月當十倍今日聰明一年特生光慧十
年間仙道矣得常乃作冷泉吟法通又曰吾有玉經妙旨子若斂
華就實可以混合天人離情理識得常再拜執弟子禮居紫陽觀
二十年不踰戶閭吳主時華姥山一夕有童子歌曰靈菌長金刀
響山中人數聳之慮有兵是年盛產黃芝經月枯悴得常遂逝焉
見十國春秋

僧祖局善陰陽五行之術楊行密將攻杭州潛命至城下偵險易
反報曰是腰鼓城也擊之不下又聞其鼓角聲曰錢氏子孫貴盛
未易謀也後悉如其言見十國春秋

南唐僧休復北海王氏子也幼出家十九納戒南唐主李昇創清
涼道場延居之保大元年十月致書辭李璟取三日夜子時入滅
璟令本院至時擊鐘及期眾集休復端坐警眾曰無棄光影語絕

而逝時環聞鐘聲登高臺遙禮深加哀慕收舍利建塔焉南唐書有傳

僧應之本王姓其先閩人也能文章習柳氏筆法以善書冠江左初舉進士一黜於有司投冊罵曰吾不能以區區章句取程於庸人遂削髮爲浮屠保大中賜紫命寫楞嚴經既成上之元宗曰是深得公權之法者也書名由是益振遷右街僧錄固辭求居奉先禪院許之應之多著述尤喜音律嘗以讚禮之辭寓諸樂譜其聲少下而終歸梵音讚念協律自應之始南唐書有傳

僧深居金陵說法元宗常置綵一篋劍一具謂深及文益曰高座若問答得當賜雜綵否則賜劍文益升座深曰今日奉勅參問師還許不文益曰許深曰鷄子過新羅捧綵便行一日同智明過淮見漁人布網有魚從網出者深曰此卻與衲僧相似智明曰爭如

當時不入網羅深曰公少悟矣智明至中夜方省南唐書有傳

僧智明住金陵清涼禪院後主延之登座有僧問言句盡落方便不落方便智明曰國主在此不敢無禮其元機多如此南唐書有傳

僧清稟泉州人常參雲門印悟後主迎居光睦未幾召入澄心堂集諸方語要凡十年出住瑞州之洞山南唐書有傳

潘辰者少居和州樵採雞籠山以養其親嘗過江至金陵泊舟秦淮口有老父求同載辰敬其老許之時大雪辰市酒與同飲中流酒盡老父於髻中取小葫蘆傾之飲不竭辰益敬之至岸謂辰曰子事親孝復有道氣可教也乃授以道術辰由是往來江上屢著變幻之異李昇召居紫極宮數年卒臨歿上言乞桐棺葬近地後當尸解從之使中貴人護葬於金波園南唐書有傳

女冠耿先生者軍大校耿謙女也玉貌鳥爪常著碧霞帔保大中
游金陵以修煉爲事元宗召見悅之嘗擲雪爲鋌藝之成金指痕
隱然其上又因宮人埽除取箕中糞壤煉爲白金先是大食國進
龍腦油二器其味辛烈服之蠲疾先生見之曰此非佳者當爲陛
下致之乃以縑囊懸龍腦於屋棟須臾漉如注香味逾所進者久
之宮中忽失所在或云影見之江淮間南唐書有傳
文益一名法眼住清涼院後主欲拒王師禪師因觀牡丹於大內
作偈諷之曰擁毳對芳叢由來趣不同髮從今日白花是去年紅
豔冶隨朝露馨香逐晚風何須待零落然後始知空南唐書有傳
智筠河中府人後主創淨德院延請居之賜號達觀禪師久之迺
曰吾不能投身巖谷滅迹市廛而出入禁庭以重煩世主吾之過
也遂辭歸故山南唐書有傳

木平和尙知人禍福唐主召見於百尺樓木平指樓言曰此宜望
火初不論其意及淮甸交兵龍安山置烽堠應江北後主常登望
以占動靜其言始驗南唐書有傳

許堅性嗜魚不去鱗腸盤白山觀前有放生池堅吐所食魚入水
卽躍去每和衣入溪澗中人問其故曰天象森列吾裸程可乎一
日呼逆旅道士共浴忽凌波如履平地乃漸遠手招道士笑而去
靜照昇州奉先寺僧悟徹元機建康志載南唐葬師於殊勝院院
在城南門外王荊公書靜照禪師塔詩

譚紫霄泉州人得漢張道陵符篆盡能通之効鬼神治疾病多效
後主召至建康賜官不受所獲醮祭之施轉給賓旅年百餘歲無
疾而卒人咸謂尸解云見十國春秋

法泉隨州人出家蔣山過目成誦晚年奉詔住智海禪寺問眾曰

赴智海留蔣山去就孰是眾無對乃索筆書曰非佛非心徒擬議
得皮得髓慢商量臨行珍重諸禪侶門外千山正夕陽書畢坐逝
見十國春秋

清護開寶三年江南後主請入報恩淨德二道場說法眾問諸佛
出世天花亂墜有何祥瑞師曰昨日新雷發今朝細雨飛問如何
是諸佛元旨師曰草鞋未履後賜號妙行禪師見十國春秋
匡遜初住潤州慈雲寺江南國主請主報恩上院一日上堂示眾
曰人無心合道道無心合人久道既合是名無事又云人迷謂之
失人悟謂之得得失在人何關於動靜見十國春秋

僧行言泉州人得法於淨慧禪師江南新建報慈道場命行言大
闡宗猷署號曰元覺導師升堂謂眾曰森羅萬象諸佛洪源顯明
則海印光澄冥昧則情迷自惑苟非通心上士逸格高人何已於
諸塵中發揚妙極卷舒物象縱奪森羅示生非生應滅非滅生滅
洞已乃曰真常南唐書有傳

元寂受業昇元寺性爽悟博通經藏保大中詔講法華經賜號明
教大師賜紫嗣出居長干寺見十國春秋

文遂年十六卽悟道楞嚴經乾德中延主長慶寺

法燈生而知道辯才無礙止金陵清涼寺大道場重開祖席

王棲霞一名敬真七歲以神童及第天祐時南渡居茅山脩道唐
主加號真素先生嘗問何道可致太平對曰王者治身心乃及國
家陛下尙未能去飢嗔飽喜何論太平見十國春秋

譚峭字景升煉丹南岳城能入水火隱形不見嘗著化書授宋齊
邱齊邱利其書虐峭以酒醉而縫以革囊投諸深淵有漁人剖之
峭睡正濃呼問曰我譚景升也齊邱奪我化書沈我於淵睡囊中

得大休歇南唐書有傳

宋佛果初止碧巖道休樞密鄧子常奏賜紫服詔住金陵蔣山法席之盛學者至無地以容建炎初賜號圓悟禪師

清遠臨邛人嚴正寡言幼讀法華經了然會悟宣和初至蔣山之東堂一日飯訖趺坐謂眾曰諸方老宿臨終必留偈辭世世可辭耶且將安往乃合掌懷衲而逝

郡圃老卒不知姓名張稚圭爲江東漕攝建康府事喜與方士游一日行郡圃見老卒項繫念珠問之汝誦經乎對曰數息爾稚圭異焉呼至室中問其所得論養生吐納之術悉造精微又曰運使平生殊錯用心酷虐用刑非所以爲子孫福延納方士皆非有道者此曹特覲公惠耳稚圭歎服欲傳其法不果

慧新紹興初止建康之普光庵大衆皈依雲侶輻輳

贊元卓錫建康之蔣山閑靜寡言名來無貴賤寒溫外無別語王荆公喜與之游後居定林初覺煩動卽造贊元相向默坐終日而去

張椿齡句容人徽宗時與皇甫坦同被寵眷蓋劉混康之流

笄淨之句容人學仙人導引之術哲宗時賜號守靜凝和真人政和三年卒遺表以去奢去泰爲諫徽宗朝追諡冲隱真人今茅山有笄先生瘞劍池

邢汝嘉溧水人七歲能文善談名理身長七尺居茅山稱高士孝宗召賜巾幘并御製詩贈之勅送還山重建藏室獲施予金帛數萬謂門人曰吾非好此明年將大饑嘉定二年二月二十二日不疾而化是歲秋穀不實眾賴以濟號爲眞應先生

智福長蘆寺僧有才略見王安石記

龐眉僧主壽聖香積院秦觀稱其淡然若無意於世與之言心如其貌蓋知道者云

沙應六合人本李氏子爲沙門有道人以相法授之遊京師以東明二字贈蔡京京敗貶潭州卒於東明寺其言始驗

元雪邨金壇人劉姓博精儒典不落塵俗至正閒止句容崇明寺說法語言超邁著有雪邨語錄

明周顛建昌人年十四得狂疾走南昌市中乞食每謁長官必曰告太平太祖平南昌還金陵顛亦隨至曰告太平日語如是太祖厭之一日命覆以巨缸積薪燬之薪盡啟視則無恙遂命寄食蔣山僧寺已而僧來訴顛與沙彌爭飯怒而不食且半月太祖往視顛顛無飢色後整衣作遠行狀遂辭去友諒平太祖遣使往廬山求之不得疑其仙去帝親撰周顛仙傳紀其事明史有傳

張中字景華

人少應進士第遇異人授數學談禍福多

奇中

元末隱幕府山太祖下南昌以鄧愈薦召問曰予下豫章兵

不血刃此邦之人其少息乎對曰未也旦夕此地當流血廬舍燬且盡鐵柱觀亦僅存一殿耳未幾指揮康泰反一如中言中爲人狷介寡合與之言稍涉倫理輒亂以他語好戴鐵冠人稱爲鐵冠子云明史有傳

冷謙字敬啟諸音律能畫嘗爲仙奕圖人共傳之以黃冠人見高帝授協律郎因事忤旨將誅召至便殿請飲少水就死帝許之左右以小罍盛水至謙先以一足納罍中已而漸沒呼謙輒應視之乃空罍耳帝令碎之左右執碎罍以呼片片皆應自是不復見後有遇之武當者

張三丰不知何許人寒暑惟衣一衲每事輒先知之太祖求之不

得永樂初累致書敦請乃入見嘗奏對忤旨欲殺之忽不見後上有疾有使者遇之途附進蓑衣草數莖煎湯服之立愈由此遂絕道成雲州人年十五出家興國寺獨究單傳之旨洪武中奉聘住天界寺面奏不會佛法上製詩鐫榜懸諸法堂曰不答來辭許默然西歸隻履舊單傳鼓鐘朔望空王殿示座從前數歲年勅就寺建普度大齋三晝夜上幸之室顧問文皇時命於鍾山說法聽者數萬人

慧曇天台人俗楊姓母夢吞明珠而孕出家越之法果寺通貫華嚴諸經初止蔣山後詔住天界寺特授演梵善世大禪師洪武三年奉使西域卒勅賜遺衣葬於雨花臺左

宗泐臨海周氏子始生坐即踰人異之元末隱徑山洪武元年詔致高僧泐應命首至主天界寺會高后葬大風雷雨百官恐怖泐宣偈曰雨落天垂淚雷鳴地生靈西天諸佛子同送馬如來

大悅

懷信奉化人住龍翔寺明兵下金陵寺僧星散信獨趺坐不去眾兵皆投仗而拜高帝常幸其寺改龍翔為天界一日書偈示寂詔給帑助葬

碧峯乾州永壽人少棄家人禪林脇不沾席者三年自是入定或累日不起嘗趺坐大樹下溪水橫溢人疑其死七日本涸競往視之趺坐如故眾以為神太祖詔至京師召問佛法及鬼神情狀奏稱旨後自鬻衣鉢作佛事七日沐浴更衣而逝

劉淵然贛州人幼為道士遇趙原陽授以道法旁通醫術恆以金丹活人洪武中召至闕下建西山道院於朝天宮以居之出入禁中禮遇甚至以忤權貴為所中謫置雲南洪熙改元徵還賜號長

春真人宣德中歿於治城明史附張正常傳

焦姑名奉真家中和橋南有仙術能祈陰晴永樂時建元真觀居之將死戒其弟神樂觀道士曰吾死後不用木龕只以蘆席裹尸送江浦縣定山下吾願足矣未幾雷雨晦冥忽失尸所在封妙惠仙姑

沈野雲上元人住雨花臺清源觀中從王古峯受鍊氣之術王鼎者素有惡疾野雲過而憐之許爲治療不踰月而愈遂以野雲爲師而以家藏古峯丹經十卷爲贄野雲喜曰吾自失真師養胎未脫豈意今日復見元機遂相與晝夜研尋師弟俱超元祕

智瑛上元人正統初住雲溪寺因號雲溪初行頭陀行爲諸僧負薪米力作已而有悟生平不識文字後乃能詩晚年忽語其徒曰某月日吾將逝必有風雷之警屆期果疾風震電掣茅墮瓦視瑛

已遷化矣

永慈字海州蜀人少時見僧輒喜遍參諸方得悟妙諦正統中守備太監袁誠請主東山翼善寺

定林江甯人原名周安爲周生執巾屨之役周生從諸大儒講說安時時竊聽拱身獨立不欹不倦生物故乃事楊道南先生講學破寺中心地益開朗後投雪松禪師披剃爲弟子改名定林創閣牛首號爲華嚴太史焦竑爲之記

古心溧水人幼從素庵於金陵棲霞寺講悟元機萬厯間三懷法師修報恩寺塔頂不能上夢神云待波離尊者至翼日古心至寺三拜而頂舉

守心陝西人頤而癯住宏濟寺戒行精嚴宮掖屢有經幡之錫有所度佛像曾爲鼠嚙守心見而歎曰畜生何物不足噉而殘我像

耶既夕鼠有伏死像前者法堂後山壁峭削洞深數尺許因搆小屋趺坐其中一日命移坐具徒眾莫喻至夜三鼓石壁隕其半小屋糜碎矣

慈山名德清全椒人年十二辭親入報恩寺事無極法師悟徹祕旨晚年以江南地氣柔脆宜人春冰夏雪之鄉痛自磨勵遂之龍門結老屋數間於萬山冰雪中後居登州以建造事得罪徙廣州洪恩字雪浪江甯人年十二出家長干寺以無師智得大辯才盡掃訓詁單題本文拈示言外之旨南北法席之盛近代未有

潘爛頭江甯人軼其名朝天宮羽士也能行掌心雷法曾於東園上召神取紙神怒雷火燒其頭遂病創每出游羣兒以錢索雷則以手染頭創書雷字兒掌中令握固行數武開手卽雲氣蒸蒸起雷聲轟然人有疾病以頭創書符與之病輒愈後不知所終

大艤龍舒人喜讀內典一日看人登樹始徹根源魏國公徐宏基迎主天界寺高提祖印廣度羣品

道盛閩人通百家言多發前人所未發金陵士大夫請主棲霞之中峯

觀衡霸州人俗趙姓母夢大士攜童子入門而誕焉自稱雲居灑掃至應天說戒清涼寺緇素慕之道風甚著恆躬執勞役不劬廣德揚州人日誦經史千餘言一日聞佛踰王城學道事有感遂往雲棲出家旋至江甯諸寺開解妙諦渙然冰釋嘗曰癡禪狂慧若品行不高何足以寄斯道

智旭俗姓鍾父母持白衣呪十年夢大士送子而生幼讀儒書長而出家主江甯之祖堂名公大人執經問難直決元奧死葬靈峯之眾香塢

大成楚人蒲團默坐久之豁然住棲霞寺門風峻絕無敢當鋒者
洞宗爲之再振

尹鑾頭名從龍華州人宏正年間至江甯寓邸中輒閉關臥多者
逾月少亦五六日而後起館魏國公第晝寢而寤語魏國曰適游
洞庭返樂不可支魏國愕然不信袖出兩橘畀之果洞庭產也
岳壽山句容人風骨奇異性嗜酒醉後顛舞嘗爲里中攢造黃冊
及期莫措一字里正督之甚急一夕告完隱迹而去但於筆管中
窺見數字剖開乃留別家書人始驚異知其仙去云

毛海泉居大勞山徧身綠毛目光如電自言金陵人

雪梅和尚性爽悟博通經典嘉靖中寓報恩寺每據高座講經聞
者欽服工詩秋興云雨過池塘暑氣消山岡處處亂鳴蜩侵衣樹
色搖空翠繞戶江聲落晚潮自笑疏慵忘禮樂祇將蹤迹混魚樵
降心惟有詩魔在時復臨風寫綠蕉

南洲法師江甯人洪熙元年上御便殿召見慰勞甚至遂奏乞還
南京大報恩寺以終命中官護送還京賜賚優渥著有金剛經註
解附錄二卷

劫定應天人長九尺言論侃侃晚年住長干寺以老嘉靖戊午文
室前萬年青草作實大如梅子色如珊瑚數滿百粒年正百歲人
謂草實之祥

清公禪師住城南永甯寺勤苦自勵所事大士像放白毫光夜如
秉燭常掩關參禪不與世人酬答

永正溧水人面有宿瘤性迂鈍如病形年二十祝髮長干寺究心
佛旨又酷樸齋已詩嘗鍵戶苦吟得數句生硬輒自矜喜每欲棄
置諸緣捨身清冷之淵云有妙指詩一卷

德勝字純湛吳人初抵金陵憩龍江雙忠祠觀龜趺屹立草中歎曰吳越衲子擔簦至此雙忠貫日不就是建一莖草奚適乎危坐鍵關十寒暑書寫華嚴諸經四大部

大健字蒲庵六合人卓錫永濟寺禪行精潔工詩常欲立祠以祀杜甫著有花笑軒集

暈頭陀不知何許人仁宗監國南京獵寶香山逐二虎至一巖下有老僧龐眉趺坐以衣覆二虎如馴兔仁宗怒曰妖人也將射之僧笑不顧問其名曰吾暈頭陀也公相福薄何不早出家太子不應命住興善寺不久辭去

讀體字見月雲南人姓許氏世襲軍官不屑塵俗年二十七超然遠引入劔州赤蕩巖修真三載一日行松陰下遇一老僧授以華嚴經頌唐宗旨晚主寶華山席釋氏有禪學義學律學三宗明季

律學殆絕至見月而復興嘗不坐不臥不依倚晝夜壁立者九十

日四方縑素翕然從風日食至三萬餘指

古拙住溧水壽國寺有戒行自號藕華道人恆與金陵士夫以詩相聞競傳其泉鳴知宿雨木落見秋山之句

忘所不知何許人住持永壽寺善詩文每升座講經必引五經正義互相發明就講者咸忘爲釋典絕口不譚衣食事或爲之謀謝曰我出家漢雖凍餒不足慮也蕭然掩關深領禪悅

武光輔溧水人少失父奉母惟謹好歷山水意若有所尋覓偶納涼戶外手舉大石若弄丸若有神助母卒服方外衣束仙人縹出入飄然覺有淩雲之意後不知所終

寬悅字耀鶴南京人居普德寺有堯山藏草

如愚字蘊璞江夏人賦性警敏橫發直指罔非精奧始居應天碧

峯寺後居瀟西庵註法華經以佛心求佛言支分節解妙義環生
顧璘朱之蕃爲之序

季潭浙江人居江浦石佛寺愛其山水之勝大書江山一覽四字
揭於方丈臨終作偈云形非類我我亦非形水中鹽味色裏膠青
乍而見之冷面如冰久而親之和氣春生非乍非久道出常情一
言相笑萬古風清遂跣坐而逝

永昇號太虛江浦人通書史洞契禪妙與道士蕭中同居石洞庵
所註佛經了徹通達毫無罣礙南海陳獻章過浦亟加歎賞贈詩
有公在吾儒公亦豪之句正德初賜號圓融妙覺禪師

蕭中江浦人與僧太虛隱石洞庵年八十如二十許人精內養之
學言吉凶靡不驗後雲游不知所之

殷道人江浦人居龍洞山日與牧童嬉戲時爲人傭值插秧農事

甚急比戶求助咸應之次日各田中皆有一殷道人助栽插一日
丐稻草數十束製爲草龍命牧童縱火焚之眾於煙霧中見道人
騎龍上昇至今里人立木主於正月十五日記殷道人云

王乘軒江浦人領衛運自燕京載張真人還山真人目乘軒有道
骨命留山供灑掃三年授靈官祕法能頃刻致雷雨凡祈禱驅祟
無不神應

笠居居淨明寺又居瓜步山工詩一時名人皆與之游共謂之不
庵和尚

周萬象字含青應天府人七歲出家爲朝天宮道士精通道典療
病驅邪著有奇效生平誠樸寡言笑身長五尺以上美鬚髯

閔希言一名復清山西人往來鍾山茅山閒住乾元觀有隙地喜
廣植桃杏頂一髻不巾櫛腰腹十圍叩之如鐵語言恂恂莫測嘗